

DEN AMBIENTE.....


Fotos y Texto: Jan Poets

JUBU HAPPENING A HONRA LORD CACHETE Y JAN POETS..


** Durante e grandioso y exitoso JUBU HAPPENING cu a tuma lugar recientemente na San Nicolas, e conocido Lord Cachete y boso sirbidor Jan Poets di e pagina aki DEN AMBIENTE, a ser honra dilanti un publico grandi. Lamentablemente na momento di e acto di homenaje, nos coleganan no tabata presente pa tuma e shotnan, pero pa suerte e popularisima fotografo Donna Oduber tabata presente pa yuda cu e parti di ceremonia, a tuma nota di esaki y mesora a pasa man cu e camera di DEN AMBIENTE, pa asina tog tuma e shotnan na momento cu DEN AMBIENTE a ricibi su plakaat. Hopi DANKI Donna.. Pa seis aña consecutivo "DEN AMBIENTE AWARDS" y na un ocasion a organisa "PREMIO PADU DEL CARIBE" pa rindi homenaje y reconocimiento na nos valuartenan y pa 10 aña largo e pagina aki DEN AMBIENTE, ta brindando su colaboracion pa engrandese nos Carnaval. Ta pesey mes tabata un gran honor di tambe por a sinti e sensacion na momento di a ricibi un homenaje dilanti un publico grandi. Lord Cachete kende ta un "San Nicolas Boy" tur aña ta bin for di Hulanda pa engrandese musicalmente nos Carnaval, sin duda algun a merece e reconocimiento aki. Danki JUBU, Danki San Nicolas y Danki ARUBA, "WE LOVE YOU"..



** Pa DEN AMBIENTE tabata un honor grandi di por a ricibi un plakaat di reconocimiento for di sr. Juancho Werleman, kende ta fundador di "JUBU HAPPENING SAN NICOLAS". Aki tabata e momento cu DEN AMBIENTE tabata gradici e organisadornan di Jubu Happening y tambe e pueblo di San Nicolas, na unda orguyosamente DEN AMBIENTE a NACE. Riba e plakaat ta graba: "Jubu Happening dedica na JAN POETS...Danki pa juda engrandece Carnaval di Aruba"...



** Despues di a ricibi e plakaat for di sr. Juancho Werleman, organisador di Jubu Happening, Valentino King, autor di e hit grandi di carnaval 47, "E PATO JANGE", den nomber di "Double Impact" a sorprende DEN AMBIENTE cu un plakaat di reconocimiento, como gratitud na e promocionnan cu semper el a ricibi for di DEN AMBIENTE, tanto aki na Aruba como na Antiyas y Hulanda.



** Den presencia di sr. Milo Croes presidente di S.A.C., Lord Cachete y DEN AMBIENTE a ricibi e plakaat di reconocimiento for di sr. Juancho Werleman di Jubu Happening..



** Hildward Croes di Dushi Band tambe a haya un grato sorpresa na momento cu Lord Cachete a sorprende su persona cu un Plakaat di reconocimiento como un muestra di gratitud pa tur e añanan cu Hildward Croes a sa di aregla su exitoso Calypso y Roadmarchnan.



** Organisadornan di Jubu Happening tambe a otorga Cerbez Balashi un plakaat como gradicimento pa nan valioso cooperacion pa a haci posibel cu Jubu Happening por a resulta un biaha mas den un exito rotundo. Riba foto por aprecia e momento cu e representante di Cerbez Balashi, sr. Teo Croes ta ricibi e bunita plakaat cu dos botter di Cerbez Balashi!